

江苏海运全案

江蘇巡撫部院陶 爲剴切曉諭事照得上海口岸
爲商船出入之所我

國家深仁厚澤利舶通商海隅蒼生蒙樂利者二百年矣
本年因洪湖決口蓄水無多漕運淺澀來年春運改
由海道業奉

聖旨命本部院會同

爵督部堂督率辦理並

特簡道員另調府縣預行籌辦查上海至天津洋面沙線
惟沙船最爲熟悉而沙船之耆舵水手尤屬淳良該
船戶等向來受雇貿易今得仰供

天庾之用正可展其平日急公奉上之忱諒必踴躍趨公
咸知感奮惟事屬創始誠恐該船戶等不知現在籌
辦之意合亟出示明白曉諭查海船全憑風信一交
冬令各沙船例應收口守凍其時商貨已卸本係閒
月正值各州縣徵收漕糧陸續交兌之時是沙船受
雇不致等候也載米一石卽有一石之價另委大員
當堂給發絲毫不經吏役之手雖裝官米仍與民雇
無異是沙船不致賠累也滿載之後任聽俟便開洋
不加催促是沙船行住自由不至掣肘也春初東風
司令張帆北去數日卽抵天津是沙船不患風濤也

本部院先委賢員在天津城東門外守候沙船一到
卽與卸裝放回是船戶管運不管交不患收米勒捐
也在上海受載裝米之外仍准稍帶客貨到津卸載
之後仍准放至奉天攬裝豆餅等物是官給運價之
外更有餘利也春夏風信最利趕緊往回可裝兩運
其有運米較多之船商果能兩運妥速本部院定當
奏請

聖恩賞給頂戴職銜者舵水手果能穩實勤慎認真出力
查明亦酌加獎賞是一舉而名利兩得也爾等目下
有受載商貨北上者務須早去早歸其有願在口岸

江蘇海運全案 卷五
修艙船隻聽候受雇者各隨其便一切便宜斷不稍
滋牽累爾等上報

國恩下利身家務宜踴躍及時自効此外如有堅固平穩
情願運米赴津之蜑船烏船等亦准一體受雇以示
同仁倘有各衙門吏役或土棍人等假公濟私嚇詐
爾等者本部院嚴查密訪一經察出定當照阻撓軍
國重計例處死治罪決不寬饒爾等切勿疑慮致誤
趨公本部院現在親詣上海當面傳諭行戶船商以
及耆民舵工水手人等各宜知悉特示

道光五年七月二十日示

江蘇布政使賀長齡江蘇按察使覺羅慶善署蘇松
常鎮督糧道湯藩分巡蘇松太道潘恭常前任河南
河北道鄒錫淳詳爲酌籌海運招雇商船並運送兌
收各章程詳請具

奏事案于道光五年七月初十日奉

爵督部堂琦
巡撫部院陶

札開道光五年六月二十八日奉

上諭琦善奏遵旨籌議海運折漕大概情形一摺據稱與
陶澍面商飭藩司賀長齡親赴海口督同地方官將商
船設法招徠並剝運兌裝等事逐一籌議章程再行會
奏至折漕一事江省漕額較重欲令以米易銀完納足

數民力未必裕如更恐不肖官吏增價病民甚至任意
侵挪將完作欠擬將來歲新漕先儘海運數日確切議
定再將未能起運米石設法變價解歸工用倘變價難
期迅速再行酌量存貯俟督飭江寧江蘇兩藩司定議
具奏所有來年海運事宜俟藩司賀長齡赴海口籌議
該督再會同該撫妥議具奏折色既不可行其變價存
貯二議亦俟該藩司酌核情形詳晰定議務期官民兩
無窒礙等因欽此同日又奉

爵督部堂琦 札開道光五年六月二十八日內閣

奉

上諭琦善奏請派林則徐等赴上海籌議應辦事宜等語
現在埕圩石工已砌至七分以上林則徐鄒錫淳著于
石工屆竣時前赴上海督同該縣將應辦事宜逐一籌
議等因欽此又于道光五年六月二十九日奉

上諭陶澍奏籌議海運及暫收折色停運治河各情形據
稱折色與停運二者均不可行來歲當以海河並運爲
宜廣招商船分作兩次裝載計可運米百五六十萬石
其餘仍由運河而行秋冬之間卽由河督派員將運河
挑挖深通計來春湖水益增自可引導濟運等語太倉
儲蓄本應陳陳相因停運之說原未可輕爲議及至漕

糧改徵折色卽與丁地無異以江省額征漕糧核計應折之銀爲數甚鉅民間以米易銀遽難出糶必致穀賤傷農是折漕一節江省尤難施行此事竟毋庸置議海運一事旣據該撫奏稱目前籌運之策無踰於此與琦善意見相同著俟藩司賀長齡赴海口查勘情形籌畫到日卽將一切章程會同妥議具奏等因欽此札司親赴海口督同地方官將商船如何設法招徠州縣如何運送委員如何兌收各情形立定章程籌議詳辦等因到司奉此本司賀長齡職道潘恭常遵卽會同前任河南河北道鄒錫淳親詣上海督同署松江府

知府李景嶧上海縣知縣許乃大查得本省大中兩號沙船共有一千餘隻該船商等前蒙

巡撫部院親臨面諭並出示招徠已形踴躍當日卽具到承攬七十餘船本司道等復親赴沙船開誠宣示此次裝載漕糧俱用民價平雇卽與客貨無異受雇時旣不抑勒封錮交卸時亦斷不致守候稽畱並酌定領運漕米不分正耗每石給價曹平紋銀四錢該商等各釋疑畏之心無不歡欣鼓舞連日又陸續具到承攬九百三十餘船連前七十餘船已有一千餘號之數每船裝米自數百石至二千石不等大局

已有把握復據該府縣稟稱上海尚有浙省蜆船並三不像船亦曾到過天津現在收上海口者數十號與沙船同係平底堪以雇用並經取具認雇結狀前來本司道等復親赴該船察看艙口寬深木料堅固與大號沙船相仿詢問該船戶等僉稱兩項船隻共有一百四五十號牽算每船可運米一千五百石惟該船原隸浙省應請咨明

浙江巡撫部院飭行寧波乍浦各府廳出示曉諭令該船等於冬季齊赴上海以備選雇如此兼收並用則一百五十餘萬石之米似可於春夏之間全行起

運辦理更臻妥速現據糧道冊開蘇松常鎮太四府
一州屬除南秋局恤各米外本年額徵漕白正耗共
米一百六十三萬三千一百九十五石零內漕白正
米一百十七萬七千九百十四石零加三加四等耗
米共四十五萬五千二百八十石零內除例應給丁
耗米一十八萬二千一百六十四石零實該起運交
倉耗米二十七萬三千一百一十六石零二共米一
百四十五萬一千三十石零至給丁耗米一十八萬
二千一百六十四石零原以備長途剝量折耗之用
今沙船程期較近折耗無多自應量爲節省應請糙

糧一石給耗米八升白糧一石給耗米一斗共計米
一十一萬七千五百二十二石零此係給船帶備折
耗之項毋庸議給水腳餘剩耗米六萬四千六百四
十二石零既可毋庸給丁應卽搭運作爲交倉米數
實共起運交倉漕白正耗各米一百五十一萬五千
六百七十二石零以每石四錢合算應需銀六十萬
六千二百六十九兩零加以各縣剥運上海腳價及
一切雜費爲數均屬不貲

國家經費有常况值工需緊要何敢動云請
帑致有虛糜計惟以地方本有之款籌運

天庾惟正之供則漕糧旣利轉輸官民均無苦累容俟本
司道等另行籌款隨時稟請酌辦濟用惟是海運事
屬創始本無成案可循勢難一一造報應請

奏懇

聖恩免其報銷至隨漕行月贈五等項無需動用卽可省
出銀四十萬四千餘兩米二十五萬餘石除由江安
江蘇兩糧道照減歇軍船例給發減半月糧及苫蓋
銀兩外餘俱分別查款報撥再本年帶徵道光三年
二限災緩及歷年未完帶徵漕白正耗米五十餘萬
石此項米石新舊並納民力未免拮据自應通飭各

州縣及時趕徵完納儘徵儘解兌交沙船運津以裕
倉儲至北壩交兌應給銀米各款向有糧道衙門解
給者亦有由旗丁按米給予津貼者今改由海運除
糧道衙門應解輕齋席木各款仍照例解交外其旗
丁應給各項既不動用漕項卽不能照常津貼但由
津赴通船價飯米及茶果個兒錢經紀書役飯食一
切載在漕運全書各雜費除以旗丁到通應領銀米
等款撥抵外尙多不敷現擬由本司道籌措銀兩委
員先期解赴倉場衙門暨天津道兌收分別給發稍
資協貼所有本司道等酌議海運招雇商船及帶徵

漕米儘徵儘解情形並酌擬運送兌收各章程理合會銜具詳繕開清摺呈祈

察核會

奏請

旨遵行再前任臬司林則徐因病回籍未與海運之議故未列銜理合聲明爲此備由另具書冊呈乞

照詳施行

計呈摺

一各州縣由倉次剝運上海應給水腳也查沙船均泊上海旣不能迎至各倉受兌各州縣卽需雇覓剝船

運送上海且常鎮二府距上海遠至五六百里所費不貲應請各按程途里數給予水腳銀兩現已籌款由該州縣自行坐支以免藉口賠累至上海商船攬載客貨腳價皆係全給今裝運漕糧亦應如數全給以釋其疑畏之心且一經兌米卽須趁風開行不能久待自應將水腳銀兩由司督同府州籌款先期解往上海聽候蘇松太道當堂驗發以免牙僧胥役從中侵扣

一驗米交米應專派大員經理也查海運漕糧上海爲總匯之地驗收兌裝責任綦重應請